

Siiquwaa Sabaa

Gidduwaa Erissuwaa

“Siiquwaa Sabaa” geetettiya maxaafai siiquwaa giximiyaa qoridi shiishshidoogaa. Ha giximetuppe dariya baggati mazamure meran xaafettidosona; eti attumaagee maccaarissi, maccaara qassi attumaagaassi xaafidoogeeta. Ha maxaafai issi issi birshshettatun “Siiquwaa Sabaa” woikko “Mazamure Ubbaappe Aadhdhiya Mazamuriyaa” geetettidi erettees. Hara birshshettatun qassi “Solomona Mazamuriyaa” geetettidi erettees. Aissi giikko, Ibraisxxe qaalaa xaafettida maxaafai Solomoni xaafiis giidi odiyo gishshaassa.

Ha mazamuree Kiristtoosappenne woosa keettaappenne gidduwan de7iya gaitotettaa bessiya leemisota oiqqidaagaa. SHin Aihudati, “Xoossaappenne Israa7eela asaappe gidduwan de7iya gaitotettaa bessiya leemisota oiqqiya maxaafa” goosona.

1 ¹Mazamure ubbaappe aadhdhiya Solomona mazamuree haggaa.

Geela7iyaa:

²“Ne siiqoi woiniyaa eessaappe aadhdhi ufaissiyo gishshau, ne menttershshan zaara zaaradakka tana yera. ³Ne tiyettiyo shittoi aiba sawii! Ne sunttai xeesettiyo wodekka aiba ufaissii! Geela7oti nena siiqiyoogee hegaassa. ⁴Tana nenaara ekkada ba. Haaya, ane naa77ai issippe woxxoos! Ta kawuwau, tana ne siirixaa gelissa” yaagaasu.

Yerusalaame maccaasati:

“Aban nuuni ai keenaa ufaittidonii! Nuuni a siiquwaa woiniyaa eessaappekka aattidi nashshoos. Tumukka maccaasai ubbai nena siiqanau bessees” yaagidosona.

Geela7iyaa:

⁵“Inttenoo, Yerusalaame maccaasatoo, siyite, taani karettai; gidikkonne, malanchcha. Ta karettatetta Qeedaare dunkkaaniyaa mala; shin ta merai Solomona kawo keettaa magalashotu mala.

⁶“Ta meraa karexissidaagee xuuggiya awaa; taani karettai gidido gishshau, tana karoppa. Ta ishantti, ta aayee naati tanaara ooyettidi, tana woiniyaa turaa naaganchcha oottidosona; yaatin, taani tana naagabeikke.

⁷“Ta siiquwau, ane taayyo oda; ne dorssaa wudiyaa neeni heemmiyoi awanee? Gallassi awaappe ne eta allaxissiyoi awanee? Nena demmanau ne laggetu wudiyaa kaallaidda, aibissi yuushshanchcha maccaasa gidoo?” yaagaasu.

Wodallai:

⁸“Bii, maccaasa ubbaappe aadhdha lo77iya malanchchee! Sohuwaa erana xayikko, dorssai biidosaa kaallada ba; ne deeshsha maratakka henttanchchatu dunkkaaniyaa matan heemma. ⁹Ta siiqee! Gibxxe kawuwaa paraa gaariyaa goochchiya paratu gidдон de7iya maggaayeedan lo77aasa. ¹⁰Abeet, ne haittan goolattiya alleequwaara shiiqidi, ne gacoi aiba lo77ii! Ne ziizzeekka inqquwan alleeqettidaagaa. ¹¹Nuuni neeyyo biran alleeqettida, worqqa alleequwaa ootissana” yaagiis.

Geela7iyaa:

¹²“Kawoi maaddan uttidaashin, ta shittuwaa sawoi keettaa gidдо ubban tonggu giis. ¹³Ta siiqoi ta xanttatuppe gidduwan shemppiyo wode, a penoi qarcciitaara de7iya karbbiyaadan sawees. ¹⁴Ta siiqoi Enggaada geetettiya woiniyaa sohuwan morkkida bazzo ciishshaa mala” yaagaasu.

Wodallai:

¹⁵“Ta siiqee, neeni aiba lo77ai! Neeni aiba lo77ai! Ne aifeti haraphphiyaa aifiyaadan lo77oosona” yaagiis.

Geela7iyaa:

¹⁶“Ta siiquwau, neeni aiba lo77ai! Aiba ufaissai; nu arssaikka aacida maataan ufaissiyaagaa. ¹⁷Nu keettaa zaaroi zigaa; kaaraikka xiiddan dadettidaagaa” yaagaasu.

Geela7iyaa:

2 ¹“Taani Saaroonaa giyo sohuwan mokkiya ciishshaanne wombban mokkiya lo77o ciishshaa mala” yaagaasu.

Wodallai:

²“Ee ta siiqiyaa maccaasaa gidдон xeelliyo wode, agunntaa gidдон beettiya lo77o ciishshaa milatausu” yaagiis.

Geela7iyaa:

³“Ta siiqoi hara wodallatu gidдон xeelliyo wode, woran de7iya appiliyaa giyo mittaa milatees; tana keehi ufaissin, a kuwaa gidдон uttaas; a aifee min, tana keehi mal77ees. ⁴I tana kattaa miyo aaho wuigiyyaa gelissiis; ba siiquwaa banddiraadan ta bolli xoqqu xoqqu oottiis. ⁵Taani a siiquwan ohettada harggido gishshau, zabiibiyaa aifiyaa tana mizidi gasttissite; appiliyaa tana mizidi, ta wolqaa kunttite. ⁶Ba haddirssa kushiyyaa tana borkkotissiis; ba ushachcha kushiyan tana qoommiis. ⁷Inttenoo Yerusalaame yelaga maccaasatoo, siiqoi bau dosidi denddana gakkanaashin, a intte beegottenna mala, taani inttena genessatuuninne bazzo wushatun callais.

⁸“Siyite, hegee ta siiquwaa cenggurssaa! Be7ite deriyaara piriiddi, keratu bollaara xonggettiiddi gakkiiis! ⁹Ta siiqoi wushaa mala; woikko genessa maraa milatees. Be7ite, i nu keettaa dirssaa matan eqqiis; eqqidi maskkootiyaara soo xeellees; magalashuwaa garssaarakka luuxxidi xeellees. ¹⁰Ta siiqoi tana hagaadan yaagees; ‘Ta siiqee, dendda! Ta malanchchee, haaya! Issippe ane boos. ¹¹Be7a, balggoi aadhdiis; iraiikka eqqiis. ¹²Biittan ciishshai ciyyiis; yettaa yexxiyo aginaikka gakkiiis; haraphphiyya yettai nu biittan siyettees. ¹³Balasee aifiyaa doommiis; woinee ciyyiis; a ciishshaa sawoi biittan tonggu gees. Hegaa gishshau, ta siiqee, dendda; ta malanchchee, haaya; ane issippe boos’ yaagees” yaagaasu.

Wodallai:

¹⁴“Neeni aafuwaa doona zaallaa za7an qosettida haraphphee mala; ane issitoo tana ne som77uwaa bessa; ne cenggurssaakka sissa. Aissi giikko, ne cenggurssai tana qarettees; ne som77oikka daro lo77ees” yaagiis.

Yerusalaame Geela7oti:

¹⁵“Nu woinee ciyyiis; heгаа gishshau, nu woiniyaa gidduwaa bashshiya worakanata, he qeeri worakanata piriyya wottidi oiqqite” yaagidosona.

Geela7iyaa:

¹⁶“Ta siiqoi taagaa; taanikka aaro; ciishshaa gidдон i ba wudiyya heemmes. ¹⁷Qamma xumai qaarettanaashin, maallado carkkoi carkkanaashin, ta siiquwau, genessaadan woikko yelaga wushaadan, aafotiya deriyaara woxxaidda haa simma” yaagaasu.

Geela7iyaa:

3 ¹“Qamma kumettaa ta hiixan zin77ada, ta siiquwaa demmanau amottaas; minttada koyaas; shin demmanau danddayabeikke. ²Katamaa gidдон de7iya aahonne xunnta ogetu ubban yuuyaas; ta siiquwaa demmanau koyaas; minttada koyaas; shin demmanau danddayabeikke. ³Katamaa yuuyi naagiyaageeti tana demmidosona; taanikka, ‘Ta siiquwaa be7idetii?’ yaagada eta oichchaas. ⁴Etappe yaa kanttanne ta siiquwaa demmaagaas. I taappe kessi ekkennaadan, minttada oiqqaa; oiqqada taayee soo ekka efaas; ta yelettido kifiliyya gelissaas. ⁵Inttenoo Yerusalaame yelaga maccaasatoo, siiqoi bau dosidi denddana gakkanaashin, a intte beegottenna mala, taani inttena genessatuuninne bazzo wushatun callais” yaagaasu.

Yerusalaame Geela7oti:

⁶“Hagee bazzoora yiyaagee, cuwaa tuussaa milatiyaagee, peenoikka zal77anchchaa ixaanaadaaninne karbbiyaadan sawiyoogee i aibee? ⁷Hegaa be7ite, Solomona paraa gaaree yees; he paraa gaariyya Israa7eelappe doorettida wolqqaamati, usuppun tammu tooranchchati ajabidosona. ⁸Eti ubbaikka bisuwaa ohettaa meezetidaageetanne olankka paaccettidaageeta. Qamman gakkana metuwaa eqettanau, eti issoi issoi bisuwaa gixxidi giigidaageeta. ⁹Kawuwaa Solomoni paraa gaariyya gidдон baayyo uttiyo kawotaa araataa giigissiis. I araataa Liibaanoosa deriyaappe ehiido mittaappe ootissiis. ¹⁰Araataa tuussati biran sheeshettidosona; gedee worqqan alleeqettiis; uttiyoosai Yerusalaame geela7oti ochchaa teeraa milatiya qacinan, siiquwan daddido afalan kamettiis” yaagidosona.

Geela7iyaa:

¹¹“Inttenoo, Xiyooone geela7otoo, Kawuwaa Solomona be7anau haayite! I keehi ufaittido, a bullachchaa gallassi a

aayyiyaa a huuphiyan wottido kallachchaa goxxi uttiis” yaagaasu.

Wodallai:

4 ¹“Ta siiqee, neeni aiba malanchchee! Neeni aiba lo77ai! Ne aifeti ne som77uwaa kammiyo sharbbe giddoora be7iyo wode, haraphphiyaadan lo77oosona. Ne binnaanai Gala7aade Deriyaappe wodhdhiya deeshshaa wudiyaa mala. ²Ne achchai meedettidi, haattan meecettida ubbaikka menttiyaa yeliya, eta giddon mainee baina dorssaa wudiyaa mala. ³Ne menttershshati zo7o qacinaa mala; ne haasayiyo wode daro ufaissosona. Ne naa77u gacota sharbbiyaa giddoora xeelliyo wode, issi roomaaniyaa naa77u kessi phalqidoogaa milatoosona. ⁴Ne ziizzee ola miishshaa kaqqanau gimbbido, Daawita adussa gimbbiyaa milatees; he gimabee sha7u mino olanchchatu gondallee kaqettin, alleeqetti uttiis. ⁵Ne xanttati naa77ai mente yelettida, woraa ciishshaa giddon miya genessa marata milatoosona. ⁶Qammai wontanaashin, kuwai kichchanaashin, karbbiyaa deriyaanne ixaanaa keraa baada shemppashshana. ⁷Ta siiqee, ne asatetta muleekka malanchcha; nenan wottiyooobi aibinne baawa.

⁸“Ta mishiree, Liibaanoosa Deriyaappe wodhdha. Gaammoinne maahee geessiyoo Amaana Deriyaappe, Saniira Deriyaappenne Hermmoone kiikiyaappe wodhdha. ⁹Ta siiqo michcho gidiya ta mishiree! Ne aifiyaa xeeloinne ne qooriyaa alleeqoi, ta wozanaa ufaissan gooshshiis. ¹⁰Ta siiqo michcho gidiya ta mishiree! Ne siiqoi tana aiba ufaissii! Ne siiqoi woiniyaa eessaappe aadhdhi ufaisses; ne shitto ubbabaappekka aadhdhidi sawees. ¹¹Ta mishiree, ne menttershshaara eessaa ililoi xokkees. Ne doonaappe eessainne maattai pultees; ne maayoi Liibaanoosa xiiddai sawiyooogaadan sawees. ¹²Ta siiqo michcho gidiya ta mishiriyaa yuushoi direttidi naagettiyo ataakilttiyaa sohuwaa mala. Yuushoi gimbettido pulttuwaa, maatafai attamettido goggiya haattaa mala. ¹³Ne ataakilttetu giddon: roomaane, doorettida ataakilttiyaa aifeti, heenainne narddoosiyaa giyoogeeti de7oosona. ¹⁴Hegaadankka qassi narddoosee, laadee, sawo maatainne qarafai, hegaadankka ixaanadan sawiyaabati de7oosona.

Hegaadankka qassi karabee, godare uutta ciishshainne dumma dumma qimamiyaa ataakiltteti mokkoosona. ¹⁵Neeni ataakilttiyaa sohuwaa aliya pulttuwaa mala; de7o haattai beettiyo ollaa mala; Liibaanoosa Deriyaappe goggiya shaafaa mala” yaagiis.

Geela7iyaa:

¹⁶“Huuphessa bagga carkkuwau, dendda! Tohossa bagga carkkuwau, haa ya! Ta ataakilttiyaa bolli carkka! A sawoi hegan tonggu go. Ta siiqoi ba ataakilttiyaa giddo yo. Daro mal77iya teerata mo” yaagaasu.

Wodallai:

5 ¹“Ta siiqo michchiyo gidiya ta mishiree, be7a; taani ta ataakilttiyaa giddo gelaas. Ta karbbiyaanne ta shitto ciishshaa qorais. Eessaa oittaa yolttayada mais. Ta woiniyaa eessaanne ta maattaa uyais” yaagiis.

Yerusalaame Geela7oti:

“Inttenoo, a laggetoo, siiquwaa alana gakkanaashin uyite” yaagidosona.

Geela7iyaa:

²“Taani qammi xiskkaas; shin ta wozanai beegotti uttiis. Ta aimuwan ta siiqoi hagaadan yaagiiddi, penggiyaa qoxkishin siyaas; “Ta mishiree, ta siiqee, nenan wottiyooobi baina ta haraphphee, tau kariyaa dooya; ta huuphee akkan ka77iis. Ta binnaanaikka qamma diifiyan narkkakkiis’ yaagees.

³“Taani, ‘Ta maayuwaa qaararggaas; zaara maayooyye? Ta gediya meecettaichchaas; zaarada urqqayooyye?’ yaagaas.

⁴“Ta siiqoi ifittaa xoo7iyaara ba kushiya soo yeddiis; ta wozanai a gishshau poddi poddees. ⁵Yaatin, ta siiquwaassi kariyaa dooyanau denddaas. Kariyaa dooyiyo hiraquwaa taani oiqqiyo wode, ta kushiyaappe karabee, ta biradhdhiyaappe shitto xokkees. ⁶Ta siiquwaassi kariyaa dooyaas; shin dooyiyo wode i baawa biichchiis. A cenggurssaa siyanau kehi amottaas. Minttada a koyaas; shin demmanau danddayabeikke. Xeegeas; shin tau koyibeenna.

⁷“Yuuyidi katamaa naagiyaageeti tana demmidi, wadhdhidosananne masunxissidosona; katamaa dirssaa naagiyaageeti ta qumaashshaa qaari ekkidosona.

⁸“Inttenoo Yerusalaame geela7otoo, ta siiquwaa demmikko, taani a siiquwaappe denddidaagan harggiyoogaa, hadara, au yootite” yaagaasu.

Yerusalaame Geela7oti:

⁹“Nenoo, maccaasa ubbaappe aadhdhida malanchchee! Ne siiqoi tumu haratuppe waani dummatii? Neeni haggaa peeshi nuna calliyoogee, i haratuppe dummatiyoi aibiinee?” yaagidosona.

Geela7iyaa:

¹⁰“Ta siiqoi daro lo77iyaagaanne mino; tammu sha7u attumaasaa gidдон a mali baawa. ¹¹A huuphee worqqa luliya milatees; a binnaanikka lo77onne quuro mala kareta. ¹²A aifee shaafaa lanqqiyan eqqidanne maattan meecettidabaa milatiya haraphpheta milatees. ¹³A gacotikka sawo maatainne qimamee tokettido madabaadan lo77oosona; a menttershshati karbbiyaa shittoi xokkiyo wora ciishshaadan lo77oosona. ¹⁴A kusheti inqquwan alleeqettida worqqa xam77aadan lo77oosona; a asatetai sampperiyaa giyo inqquwan alleeqettida danggarssaa achchaa mala. ¹⁵A gedeti worqqa baasuwan tokettida, ibinabaradiyaa tuussaa milatoosona; a merai zigan alleeqettida Liibaanoosa Deriyaa mala. ¹⁶A doonai eessaadan mal77ees. I muleerakka lo77iyaagaa. Inttenoo Yerusalaame geela7otoo, ta siiqoinne ta laggee haggaa milatees” yaagaasu.

Yerusalaame Geela7oti:

6 ¹“Maccaasa ubbaappe malanchchee! Ne laggee awa biidee? Nuunikka nenaara issippe koyanau, i biido ginaa nuuyyo yoota” yaagidosona.

Geela7iyaa:

2 “Ta siiqoi dorssaa wudiyaa heemmanaunne lo77iya ciishshaa shiishshanau, shittuwaa sawo maatai de7iyo ataakilttiyaa gidдо wodhdhiis. ³Taani ta siiquwaaro; ta siiqoikka taagaa. I ciishshaa gidдон wudiyaa heemmes” yaagaasu.

Wodallai:

⁴“Ta siiqee! Neeni Tirxxa katamai lo77iyooogaadan lo77aasa; Yerusalaamedan daro lo77aasa; banddiraa oiqqidi, salppiyan biya olanchchai yashshiyooogaadan yashshaasa. ⁵Hayyanaa ne aifiyaa taappe wora zaararkkii, aissi

giikko, eti tana waissoosona. Ne binnaanai Gala7aade Deriyaappe wodhdhiya deeshshaa wudiyaa milatees.

⁶Ne achchai meecettidi kiyiya, ubbaikka menttiyaa menttiyaa yeliya, eta gidдон mainee baina dorssaa wudiyaa mala. ⁷Ne naa77u gacota sharbbiyaa gidдоora xeelliyo wode, naa77u kessido roomaniyaa teeraa milatoosona.

⁸Usuppun tammu macca kawotinne usuppun tammu baakkoti, qassi qoodai baina geela7oti tau de7oosona. ⁹SHin ta haraphphiyaa, ta boree bainaara, a tau dumma. A ba aayeessikka mexi issinno; o yelida aayyiyaakka aibippenne aattada o siiqausu. Geela7otikka o xeellidi, ‘Hanna anjettidaaro’ yaagoosona. Macca kawotikka baakkotikka o sabboosona;

¹⁰“Hanna maallado xalqqiyaadan doliyaara, aginaadan poo7iyaara, awaadan caddiyaara, banddiraa oiqqidi salppiyan biya olanchchaadan yashshiyaara a oonee?” yaagoosona.

¹¹“Taani wombban tokettida mittatu licuwaa be7anau, woiniyaa turai aacidaakkonne qassi roomaaneekka ciyyidaakkonne xeellana, duge ataakilttiyaa sohuwaa wodhdhais. ¹²Taani akeekennan de7ishin, ta amoi tana efiidi, ta kawuwaa lanqgen, paraa gaariyan tana utissiis” yaagiis.

Yerusalaame Geela7oti:

¹³“Nenoo SHulaame biittaappe yiidaaree, haaya; haa simma! Nena nu loittidi xeellana; haa simma!” yaagidosona.

Geela7iyaa:

“Daro asaa sinttan yexxiya asaadan, tana aissi xeelleetii?” yaagaasu.

Wodallai:

7 ¹“Kawo na7adan lo77iyaaree! Ne gedeti neeni naxala caammaa wottidaashin be7iyo wode aiba lo77iyoonaa! Ne sheechchee eranchcha wogaacee qoxxiidi, loitti alleeqissido inqquwaa milatees. ²Ne gul77ai woiniyaa eessai kumido birilliyaa milatees; ne xeessaa yuushoi ciishshan qashettida gisttiyaa mirqqiyaa milatees. ³Ne naa77u xanttati mente yelettida, genessee marata milatoosona. ⁴Ne ziizzee danggarssaa zaaliyan alleeqettida adussa gimbbiyaa mala. Ne aifee gita Haseboona katamaa

penggiyaa matan de7iya zeero haattaa milatees. Ne siiree Damasqo xeelissidi gimbbido Liibaanoosa gimbbiyaa milatees. ⁵Ne huuphee Qarmmeeloosa Deriyaa milatees; ne lose binnaanai qacinaa xaattaa milatees; kawuwaakka ne huuphiyaa dattai ufaissii. ⁶Ta siiqee, ne aiba lo77ai! Ne aiba malanchchee! Ne siiqoi tana aiba ufaissii! ⁷Ne geesai zambaa geesaa milatees. Ne xanttai zambaa aifiyaa wurccuwaa milatees. ⁸Taani, 'Ha zambaa gi77ana; gi77ada a marata oiqqana' yaagaas. Ne xanttai woiniyaa teeraa wurccuwaa mala; qassi ne siiriyaara kiyiyya peenoi appiliyaa aifiyaadan sawees. ⁹Ne yeroi menttershshatuppenne achchaappe gidduwaara yalalattiiddi geliya, ubbaappe aadhdhidi mal77iya woine eessaa mala" yaagiis.

Geela7iyaa:

¹⁰"Taani ta al77o siiquwaaro; ikka tana amottees. ¹¹Ta siiquwau, haaya; naa77ai katamaappe kiyidi biidi, gaxariyan aqoos; qammaa naa77ai hegan aattana.

¹²Maallado guuran ane woiniyaa turaa giddo boos; biidi woine turai ciyyidaakko, ciyyidi aifiyaa herxxexxidaakkonne, qassi roomaaneekka aifidaakko ane be7oos.

Taani ta siiquwaa nena hegan bessana.

¹³Inkkoyiyaa aifiyaa sawoinne hara ufaissiyaa ataakilttiyaa aifee nu karen bessii; ta siiquwau! Ha aifetuppe teeridaageetanne ooratta maxidoogeeta neeyyo ashsha wottaas.

8 ¹⁴"Neeni tau allaga gidennan, taayee xanttaa xammida ta ishha gidarkkiishsha! Yaatiyaakko taani nena ogiyan demmada shiishsha ekka yerin, tana ooninne borennashin. ²Taani nena kaalettada, taayee qol77o gelissaagin, hegan tana ne siiquwaabaa tamarissidabaa gidarkkii. Roomaniyaa gum77ido mal77iyaagaa, lo77iya woiniyaa eessaa taani nena hegan ushsharkkinaa. ³Tana hegan ne haddirssa qeesiyaa borkkotissada, ne ushachcha kushiyan qoommidabaa gidarkkii.

⁴"Inttenoo Yerusalaame geela7otoo, Siiqoi ba wodiyan denddanaashin, qaasetti denttennaadan, taani intteyyo hadara gais" yaagaasu.

Yerusalaame Geela7oti:

⁵"Ba siiquwaa hashiyan zempada, bazzoppe yiyaara hanna oonee?" yaagidosona.

Geela7iyaa:

"Beni ne aayyiyaa nena bannakka yelido, appiliyaa lanqqiyan ne zin77idaashin, nena ta qaaserettada denttaas. ⁶Merinaa siiquwan tana ne wozanaa bolli attama; ne qesiyankka maatafaadan, ta xallaa oiqa. Aissi giikko, siiqoi haiquwaa mala mino; mishoikka duufuwaa mala meqettaa iita; a lacoikka Xoossaa tamaa lacuwaa mala. ⁷Haattaa daroi siiquwaa tamaa toissanau danddayenna; di7oikka meeccidi efaanau danddayenna. Asi siiquwaa shammanau bau de7iya aqo ubbaa immikkokka, siiqoi miishshan shamettenna gishshau, asai he miishshaa karees" yaagaasu.

Geela7ee Ishati:

⁸"Nuuyyo tiran xanttai uttibeenna michchiyaa de7ausu; azini o oichchikko, nuuni iyyo oottanabi aibee? ⁹A gimbbe dirssa gidiyaakko, nuuni i bolli wochchiyo adussa, bira gimbbiyaa gimbbana. A dirssaa pengge gidiyaakko, zigaa xaulan o doodissana" yaagidosona.

Geela7iyaa:

¹⁰"Hekko taani dirssa gimbbe; ta xanttaikka gimbbiyaa bolli gimbbettida wochchiyoosaa; heгаа gishshau, taani ta siiquwaara de7iyo wode, i tanan ufaittees.

¹¹"Solomonassi Ba7aali-Hamoonan woinee tokettido shooqai de7ees; he woiniyaa gidduwaa oottiyaageetussi keraa immiis. Keraa ekkidaageeti teeran go7ettidoogaa gishshaa huuphiyan huuphiyan sha7u biraa ayyo ehoosona. ¹²SHin taayyo ta buzo woinee tokettido shooqai de7ees; Solomonaa, neeni sha7u biraa ekka; ataakilttiyaa oottiyaageeti naa77u xeetu biraa ekkona" yaagaasu.

Wodallai:

¹³"Nenoo, ataakilttiyaa gidдон de7iya ta siiqee, ne cenggurssaa ne laggeti siyanau koyoosona; ne cenggurssaa tanakka sissa" yaagiis.

Geela7iyaa:

¹⁴"Ta siiquwau, taakko eesuwan haaya! Sawo maatai mokkiyo deretu bollaara, guppiya genessaa woikko wushaa marata milata" yaagaasu.